

目70
805
部-

图
敕
正
库



敘

歲在辛丑冬十二月余承乏嘉定教諭之官日茂才直卿

錢君執弟子禮來見倜儻奇偉詞論風生詢知爲同門友

趙堂大令之子四歲失怙母陳太孺人教以讀書始得成

立方之畫荻折夔無多讓也明春舉行鄉飲酒禮延令伯

小廬先生爲大賓士論翕然蓋君家先世俱以鉅人長德

伏海內文章學問代有淵源而君與令兄小潭釗暨姪又

沂慶曾乃秋慶成皆早孤力學著名于時先後以制藝經

古受知于學使春浦祁公可謂善承家學者矣君精刻石

有聽松亭印存四卷前教諭朱君霞謂深得秦漢遺法近

人黃小松陳昂生未能或之先也尤能以羊毫作小篆蒼



勁入古爲人所稱余雅愛之嘗屬書楹帖置之座隅一昨
觴余于明唐叔達先生讀書處曰梅花館香雪滿林夕陽
在地顧而樂之挹酒論文知有校刊楹書之志先仿梅氏
詩譜手輯錢氏藝文志畧一書余讀而稱善者再故家文
獻蔚爲鉅觀更得掇拾其餘俾先人緒論微言同尊千古
讀書者見逸象于康成懷古者緬流風于隨會孝思不匱
嘉惠士人史館儒林繩武而起江左青箱永屬德門世守
不亦偉歟遺書刊布當以先覩爲快也道光癸卯二月初
吉涇縣董正治書

嘉定錢氏藝文志畧

吾家先世俱孝弟力田潛德弗耀五世伯祖介邱公高
祖考陳人府君行始以讀書積學著名于時自是而後
代有聞人海內溯嘉定學問文章必本錢氏蓋祖孫父
子叔姪兄弟繼繼承承後先輝映故爾余少孤失學家
計清寒而著述畱遺持守惟慎先後謹梓字學海珠後
漢郡國令長攷補續漢書藝文志三國志辨疑行世并
校刊孝廉方正錄對牀風雨圖題詠附錄家乘因次藝
文見聞所及各志篇目至其書畫技術爲人所重一脈
相傳具有法度行將別書梗概彙爲一編俾後之人知
淵源之所自也錢師璟直卿書

東岡吟稿四卷

右五世伯祖介邱公著

公諱麟字介邱歲貢生官巢

縣訓導鄉飲大賓卒年七十有三

贈文林郎淇縣知

縣縣志附見父諱瑜公傳

字學海珠公自序

蘇州府志辨正三卷

星命瑣言二卷

大學各本參攷二卷

振鐸一卷門人曹氏桂芳序

右高祖考陳人府君著

公諱王炯字青文號陳人諸

生鄉飲大賓

誥贈奉政大夫翰林院侍讀學士加三

級壽年九十二州縣志有傳

四書類編十卷

論學書二十四卷

存養廛文集八卷

右曾伯祖子辰公著

公諱民初名樞字子辰號生翁

布衣陸清獻公入室弟子卒年三十有七州志有傳

能爾齋印譜六卷唐氏孫華序

篆書集略十卷

右曾伯祖滄洲公著

公諱楨字寧周號滄洲歲貢生

卒年七十有八

五經人物攷四十卷

右曾伯祖蒼雪公著

公諱松字茂南號蒼雪監生古

今圖書集成館纂修官書成授知縣官河南淇縣知縣

加二級卒年五十有九州縣志有傳

望仙橋志四卷詩文選三卷 小山自箴錄五卷

養新堂詩文稿十卷洪氏正韻辨悞三卷

右曾祖考小山府君著 公諱桂發字芳五號小山諸

生 誥封奉政大夫翰林院侍讀學士加三級鄉飲介

賓 晉中憲大夫詹事府少詹事廣東學政卒年七十

有九州志有傳

經典文字攷異三卷

此書糾正諸經相沿俗字以許氏說文為準

唐石經攷異一卷

聲類四卷門人汪氏恩跋

廿二史考異一百卷附修唐書史臣表一卷公自序

三史拾遺五卷

諸史拾遺五卷俱門人李氏賡芸跋

二書俱採同時諸人之說以補攷異之所未及者

南北史雋一卷

唐學士年表一卷

宋中興學士年表一卷

元史氏族表三卷公自序門人黃氏鐘跋

元史藝文志四卷公自序

四史朔閏攷四卷阮君福序

通鑑注辨正二卷

門人戈氏宙襄序略曰先生于正史外獨愛溫公通鑑

謂胡氏注援引詳贍最有功于是書然亦不能無千慮之失因摘其尤甚者辨而正之得百有四十餘條

洪文惠年譜一卷

洪文敏年譜一卷

陸放翁年譜一卷

王伯厚年譜一卷

王弼洲年譜一卷俱門人李氏賡芸跋

鄞縣志二十卷

長興縣志二十卷

天一閣碑目二卷書目二卷

疑年錄四卷

此書始于鄭康成終於王鳴盛共三百餘人覈其生卒

年月並正傳聞之謬

先得錄四卷 吳興舊德錄四卷

日記六十卷 文選注著作人名一卷

金石文跋尾六卷王氏鳴盛序續七卷又續六卷三續六

卷 金石待訪錄四卷 鳳墅帖釋文二卷

金石文字目錄八卷附識一卷壻瞿氏中溶跋

十駕齋養新錄二十卷餘錄三卷公自序

阮氏元序曰 國初以來諸儒或言道德或言經術或

言史學或言天學或言地理或言文字音韻或言金石

詩文專精者固多兼擅者尙少惟嘉定錢辛楣先生能

兼其成由今言之蓋有九難先生講學 上書房歸里
甚早人倫師表履蹈粹然此人所難能一也先生淡于
道德性情之理持論必執其中實事必求其是此人所
難能二也先生潛挈經學傳注疏義無不洞徹原委此
人所難能三也先生于正史雜史無不討尋訂千年未
正之譌此人所難能四也先生精通天算三統上下無
不推而明之此人所難能五也先生校正地志于天下
古今沿革分合無不攷而明之此人所難能六也先生
于六書音韻觀其會通得古人聲音文字之本此人所
難能七也先生于金石無不編錄于官制史事攷核尤
精此人所難能八也先生詩古文詞及其早歲久已主
盟壇坫冠冕館閣此人所難能九也合此九難求之百
載歸于嘉定孰不云然先生所著諸書久爲學者所讀
矣別有養新錄廿卷乃隨筆札記經史諸義之書後學
必欲得而讀之乞刻於版凡此所著皆精確中正之論
卽瑣言剩義非貫通原本者不能譬之折杖一枝舍鄧
林之大不能有也噫嘻難矣元於先生之學未能少測
厓岸僅就所自見者于百年前後約舉九難之義爲後
之史官傳大儒者畧述之

元史稿一百卷

在金陵汪氏處

三統術衍三卷術鈐一卷阮氏元序公自序

風俗通義逸文二卷 方輿紀里編 地名攷異

恆言錄十卷阮君長生序

此書以里言俗語究其自始計八百餘條

潛研堂文集五十卷段氏玉裁序

潛研堂詩集十卷續集十卷公自序弟徵君序

詞垣集四卷 曝書亭詩集注

右胞伯祖竹汀公著 公諱大昕字曉徵號辛楮又號

竹汀乾隆辛未 召試一等 欽賜舉人授內閣

中書旋中甲戌進士官至詹事府少詹事廣東學政鄉

飲大賓重游泮宮卒年七十有七崇祀鄉賢縣志有傳

國史儒林列傳姪教授諱塘別駕諱站附

說文分韻十卷

質直談耳八卷兄詹事序

右族伯祖鈍夫公著 公諱肇鰲字堯光號鈍夫諸生

卒年七十 從子諱維壩公諸生從孫諱文彬公諸生俱能文早世

大成集八卷 教授曰父性嗜學工文章泛濫史傳好聚異書晚年潛心易理手著此集未竟而卒

右從伯祖永輝公著 公諱煌字永輝監生卒年六十

有五 贈文林郎江寧府學教授

續外岡志四卷兄詹事序

回春約言周氏南序

記夢詩鈔一卷張氏允武序 祁岡詩拾遺集

右族伯祖敬亭公著 公諱肇然初名肇熹字希文號

敬亭諸生卒年七十有三 縣志有傳子諱瑞垣公諸生諱瑞輝公監生有文行

詩古訓十二卷

公自序曰予撰詩古訓凡魯齊韓三家之有可證者必引而申之非敢與毛異也守漢儒之遺說以求無悖于義理而已

爾雅釋文補三卷公自序

此書補陸氏音兼補邵氏晉涵正義之所未備

廣雅疏證二十四卷

桂氏馥序略曰可廬先生治廣雅三十年始有稿本惟其專且久是以精審

阮氏元曰嘉定錢君可廬辛楣宮詹之弟也著作等身嘗助余山左浙江兩地校士之役有蕉窗注雅圖

說文統釋六十卷公自序

書凡十例曰疏證以佐古義音切以復古音攷異以復古本采俗以祛別字通義以明互借从母以明孳乳別體以廣異義正譌以訂刊誤崇古以知古字補字以免漏落

後漢書補表八卷盧氏文弼序

序畧曰晦之先生補表凡山經地志金石子集罔不網羅綴輯視宋熊方所補奚啻過之

兩漢書辨疑四十四卷王氏鳴盛序

序畧曰是編校譌補闕精深確當生於幾千百年以下追及幾千年以上之事恍如掌上羅文

補續漢書藝文志二卷邵氏晉涵序

後漢郡國令長攷一卷公自序

三國志辨疑三卷兄詹事序公自序

長興縣續志二十卷

嘉定金石文字記四卷

邇言六卷

是編類次俗語事之見于典籍者如釋常談之例

尊聞齋文集六卷雜志六卷詩集四卷

信古編十卷

翁氏方綱謂此書張謙中所不逮因贈句云吳興舊編弗泥其古楚金小學並美于兄

得自怡齋詩集四卷 海岱紀遊四卷

練川紀聞二卷

經說十卷

分門集錄東漢以前諸儒之說散見于各書者

集杜詩三卷姪教授序

右先大父可廬府君著

公諱大昭字晦之號可廬監

生嘉慶丙辰薦舉孝廉方正

賜六品頂帶鄉飲大賓

卒年七十

贈文林郎浙江處州府松陽縣知縣加三

級縣志有傳

外孫金鶴清題諱

泮宮樂律釋四卷公自序

文廟樂律釋二卷公自序

盧氏文昭序畧曰是書首列

昭代所定律呂之度數

以絲竹爲八音之綱領而闡發精微之奧疏證同異之

原所以導一世之趨而解將來之惑重有賴也

律呂古義六卷

富詹公作灑亭別傳載其自序及明算較度等篇

易緯稽覽攷正一卷公自序

稽覽圖者鄭康成所注易緯七卷之一也

春秋左傳古義六卷

春秋三傳釋疑十卷

說文聲系二十卷 說文稗傳

淮南子天文訓補注三卷 公自序叔詹事序翁氏方綱謝

氏塘陶氏澍跋

史記釋疑三卷

公自序曰予癖嗜算術間取史記律歷天官三書疑者
釋之各得一卷

續漢書律歷志補注二卷 盧氏文弨序

述古錄二卷

阮氏元曰錢君博涉經史實事求是精心朗識超軼羣
倫所學九經小學天文地理靡不綜核尤精樂律蔡邕
荀勗庶其近之有述古錄二卷

四益齋詩鈔三卷 公自序

默耕齋吟稿一卷 曝書亭集釋註

漑亭詩文集 響山閣詞 玉葉詞

右伯父漑亭公著 公諱塘字學淵號漑亭乾隆乙酉

拔貢生己亥舉人庚子進士官江寧府學教授卒年五

十有六州縣志有傳 子諱恭彝公諱鏞公
諸生俱能文早世

論語後錄五卷

公自序曰論語後錄有七例一攷異本二校謬棗三鉤

佚記四補剩義五正舊注六采通論七集眾說

十經文字通正書十四卷 洪氏亮吉序

公自序曰十經者何周易尚書毛詩周禮儀禮禮記春

秋左氏傳公羊傳穀梁傳論語也攷十經中文字之通假故曰通正

說文解字斟詮十四卷

此書刪汰二徐之說獨存許氏原本間附已見既簡而該於校正刊誤處尤為精審

爾雅釋義十卷釋地四篇注一卷孫氏星衍洪氏亮古跋

聖賢冢墓攷十二卷

詩音表一卷 內則注三卷

新斟注漢書地理十六卷公自序

史記補注一百三十卷公自序松氏筠跋

漢書十表注十卷

鏡銘集錄四卷 古器款識四卷

呂氏星垣曰錢君澂通小學博極羣書于漢唐儒先之

學無不洞見底蘊穿穴訓詁下筆謹嚴著作宏富尤精

籀篆為天下第一晚病風痺以左手作篆直逼漢人藏

金石三千餘種既老貧遊多半散佚官陝西時值賊匪

滋事治軍民嚴整民懷其功

車制攷一卷公自序

篆人錄八卷公自序 異音七卷 載魏以前之古音

異語四卷 此書采諸書中之方言適爾雅例類次成篇以補揚子雲所未備自魏以後不復著錄

駢體文上下二卷 金鳳玉笙詩二卷

右伯父篆秋公著 公諱玷字獻之號十蘭又號篆秋

乾隆甲午順天副榜官陝西乾州州判署華州知州卒

年六十有三縣志有傳子諱萬選公有詩文能篆書早卒

蘇詩輯注 夢漁筆記孫慶曾曰公讀書一過即通曉大義經史百家無所不覽而于詞章

尤所篤好中年以後淡于進取家居以典籍自娛偶有所得纂為筆記為文不自珍惜隨作隨棄今思搜集散

亾為家藏本而迄不多得公書精真行晚年專書蘭亭日必一本自謂加我數年于此事其庶幾矣公在京師

與朝鮮貢使朴貞蕤齊家相識是時貞蕤三入燕京中朝人物竝為所知歸國之後贈公詩云飲石名家子

妙年襄利器聊將練裘書暫當梅花寄我雖未相人斯人當早貴昔曾大父少時與東南名士倡和沈尚書序

為江左七子詩流至海外西洋人讀而愛之人贈一詩當時為藝林佳話而公復得此亦異事也

右從父夢漁公著 公諱東壁字星伯號飲石又號夢

漁附監生卒年五十有三

孟子解誼十四卷公自序程氏瑤田跋

自序曰厥例有七一曰正刊誤二曰正舊注三曰集眾

說四曰存鄙見五曰正音讀六曰輯古注七曰攷異本

北平翁氏方綱見稿本大加擊賞為誤既勤字說以贈

小爾雅校證二卷公自序

補經義攷四十卷

續經義攷二十卷

吳興著述類聚攷二卷

五經異義輯存二卷

漢召陵許叔重撰高密鄭康成駁元本久軼 詹事公

輯 徵君補 公續增作序

列代建元表十卷公自序

建元類聚攷二卷公自序

豐宮瓦當文攷一卷阮氏元翁氏方綱桂氏馥黃氏易陳君淵泰俱有題跋宮簷公亦爲作詩
阮氏元曰錢旣勤孝廉沈潛篤學著書皆能自抒心得
癸丑隨可廬徵君在予幕中佐閱藏有隸字瓦當篆文
奇古予爲攷釋之其弟以成同人亦皆潛研經史金石
各有著述時人有錢氏三鳳之目

稽古錄辨僞一卷

錢志二卷

嘉定縣志三十二卷

青華閣帖攷異三卷公自序

勤有堂文集六卷

勤有堂詩集六卷

金氏錫鬯曰君端重寡言讀書鄙章句稟庭訓習漢儒
學究心訓詁旅食京師名公卿與之游見聞旣擴學術
日富尤諳于史事淹貫古今友朋講論終日娓娓不倦
官松陽時訪緝強暴獲其魁置之法暇輒與邑人士講
論文藝勗以敦品力學未二年以憂去職祭葬克盡禮
則其季弟同人以疾卒君忍痛爲之傳教養其子旋宰
上虞求治一如松陽任民思其德惜官如夢短未盡其
才或假之年治行必卓然可稱豈僅著述之美富已哉
右世父亦軒府君著 公諱東垣字旣勤號亦軒嘉慶

戊午舉人官浙江松陽上虞縣知縣充癸酉壬午兩科
浙闈同考官加三級卒年五十六

世父內敦至行外布
循聲師璟少孤飲食

寒煖公時刻關心親承教育有年愛憐殊甚辛巳公赴
選入都旋之官上虞癸未歿于任師璟失學自此始矣
琴道堂詩集四卷 題畫詩二卷

右從父石橋公著 公諱東塾字學仲號石橋廩貢生

署吳縣訓導 封修職郎安徽祁門縣教諭卒年六十

有六

爾雅疏證十九卷

詁訓之學本於聲音故有聲同字異聲近義同雖或類
聚羣分實亦同條共貫此書博采羣經及周秦諸子漢
人撰著之書就古音以求古義引伸觸類疏通證明

說文解字讀若攷三卷

說文解字闕疑補一卷

釋大一卷釋小一卷

先生自序曰摘諸經文之訓大小者證以他書觸類引
伸不限形體

釋曲一卷

字詁類纂一百六卷

此書大旨規仿儀徵阮氏經籍纂詁故所采之書畧同
惟增玉篇廣韻而已其排纂亦用佩文韻如元始也經
籍纂詁列入元字此則列入始字蓋經籍纂詁猶佩文
韻府此猶駢字類編均為小學家所不可少之書

十三經斷句攷十三卷

先生自序李氏兆洛序
祁氏寔藻序張氏敦仁跋

李序畧曰古人之文如其口語句讀卽其辭氣云爾氣得則誦其文如聞其語故殷盤周誥號爲詰屈諷誦之久心神爽然有心能領之而口不能傳之者焉至於義理之釋憑於字句一字之上屬下屬一句之或絕或連其差甚微違午斯大劉歆移讓博士已有分文析字之譏虎觀諸儒此類彌廣康成以下經師競出新致幾於望文生義各以意屬而持之成理或未師賢於往故此又多師之藉也而徒以爲章句儒之事乎哉眾家泛濫薈萃爲難錢君子樂綜而緝之條流旣通探索皆遍其所依正必衷於當可以審疑似辨異同尋古師之真啟

方來之悟裨益於講貫者多矣

方言箋疏十三卷

竹汀先生日記鈔何氏元錫跋

信芳館印存四卷瞿氏中溶序

右仲父小廬先生著 先生名繹字以成一字子樂號

小廬今優附監生 欽加一級鄉飲大賓

說文音韻表五卷

說文重文小箋二卷公自序

說文孳乳表二卷公自序

姚氏椿曰吾友同人錢君學進于古又欲有用于世其意不欲徒爲今之學者自其家世父兄皆以鉅人長德

伏海內君少涵長濡質與俱化沈篤好問早如成人又
資于世之名公卿賢士大夫以成其業故年逾弱冠而
遂有聞于遠邇君未嘗自足彌益不怠於學通訓詁自
其少時卽能以禮記鄭注校朱子大學異同其後卒爲
孟子正義一書尤精講韻學熟于古音之通借以爲古
人聲卽寓義于物皆然于說文用力致淡予初見君于
青浦王氏君方爲侍郎纂金石萃編侍郎稱其才其後
復見君于京師旣而西行則聞君應 召試舉孝廉越
三年以親憂歸歸二年而卒尊甫可廬徵君雖不仕而
名與其兄詹事公埒生子三人皆有名君其季也貌不
苟合然亦以和接物遇事卽不肯推諉嘉慶十一年歲

饑君佐徵君治邑賑事甚有條理越八年復饑亦如之
先是趙君曾曾令嘉定與君相引重及後攝寶山君貽
書以成法告之趙君用其言兩邑之民交權于道

九經補韻攷二卷公自序

孟子正義十四卷公自序

此書以世所傳孫奭疏出自僞作舛訛叢出不足以發
明趙氏義理因援引經傳詳加攷訂而作之

方言義證六卷

崇文總目輯釋

公自序略曰原書共三千四百四十五部三萬六百六
十九卷較今本多寡懸殊蓋七百餘年輾轉傳鈔未免

脫佚故有羣書所引而今無其目者某又編爲補遺附
著卷後命曰輯釋釐卷以五經部爲伯兄輯史部爲仲
兄輯子部爲金和姊婿輯集部爲秦君照若輯其子
部之上則某所輯也

列代泉幣圖攷二十卷孫氏均序

亦軒公曰季弟酷喜古泉收羅繁富時有同好如翁公
樹培方公廷瑚孫公均劉公喜海及妹夫金公錫鬯瞿
公中溶偶有所得互相贈貽榻本幾盈三千悉攷其時
以次編纂仿朱氏經義攷敘古人著述梗概成此書

元詩紀事五卷

正名錄四卷

古錢待訪錄二卷

公題辭曰予髫年卽喜古錢刀布未三載積至四五百
品自謂富矣久之得交吳越好古之士互以吉金貞石
相持質始知予所獲無過什之二三則欲然不自足作
而歎曰嗚呼泉刀之用雖廣然或古人鼓鑄本少或後
人磨鎔垂盡其厘存于世者又或爲老嫗童穉所玩弄
以予區區之心之力烏能盡古今所有彙萃之置諸一
室哉于是就所藏一一響搨其文益以友朋投贈借搨
借摹之品綴爲一帙較之嚮者所蓄已不啻倍之十餘
年來更多見於賞鑑之家以愛惜過甚恐其椎損吝不
與搨以及谷董肆上見之無力購買者歸輒記于別簡

視揚本摹本則又倍之庶幾貧兒致富矣今春家居多暇偶據所見略依時代先後依韻分隸爲待訪錄上下二卷其有史志可證暨稗官野乘足與錢文相發明者具著錢幣圖攷不復贅述于此秦以前古刀異布文字辨識不真卽舊譜攷辨亦言人人殊不敢斷其孰是而予所獲見于倉猝間者更不能悉識其偏傍點畫載之徒足貽誤方來概置不錄慎所取也昔歐陽子有言物必聚于所好而常得于有力之強予能好之而不能有力則其得之少而無由悉聚之宜矣然天下後世有有力而篤好百倍于予者可按是編求之粲然大備于一室而不至如予初志之陋也是予勤勤待訪之心也已

釋聲八卷

公自序曰言小學者有二端曰故訓爾雅說文之屬是也曰聲音釋名之屬是也有文字然後有訓詁而聲音實在文字之先故言小學必通訓詁言訓詁必先識字欲識字必先審聲音所謂聲音者萌芽於二儀初判之時廣益於草昧旣開之後非後世四聲七音三十六母之說也周公制爾雅有釋詁言訓獨無釋聲與名者是以劉氏廣之爲釋名一書然案釋訓云疇謂之帳卽繼以俯張誑也又云不辰不時也鬼之爲言歸也同聲比類已舉最凡蓋未嘗不厲釋聲於諸篇中也後儒增補間或昧于聲音如釋栝樓爲果羸之實之類若依釋魚科

斗活東之例但云果羸栝樓足矣何取一物而區以別之乎難者且曰果栝羸樓既爲同聲之字但云果羸足矣栝樓兩言詎非疣贅則又不然大抵文字有定而聲音無定氣有清濁居有南北語有高下輕重緩急長短今欲執從其一是由教燕趙之人而吐辭必學吳語強詢吃之輩而出言胥協古音此不待知者辨其惑也故論曰必也正名乎記曰書同文天下古今之名之文可正而同也天下古今之聲音則莫能一也夫聲隨人變則字亦隨之俱變書傳所紀異言殊語紛更錯雜新學後進罔識據依甚者不知督郵爲獨搖而疑神農尙無此官不知文無卽靡蕪而謂當歸以贈羈旅此釋聲之

書所繼釋名而作也余幼習家業兼稟義方得稍知小學源流年旣及冠世父詹事公示以所著聲類益知聲音之妙觸類可通因擴其例徵集羣書同物異名之文比而釋之爾雅而外以爲言故訓者首推許慎言聲音者當宗劉熙取其詮釋諸名俱以聲爲定準蓋淺有得乎六書形聲之旨者而彼所釋必據聲音以求故訓此所釋則皆以聲音概文字故其命名爾殊也冥思苦索積若干年編爲若干卷以從劉氏之後茫茫今古宜有賞心義或駭俗致來駁詰其知其罪非吾所能億中也

吳語詮六卷

公書後曰余作釋聲旣竟偶取里黨音辭近于俚俗者

證諸古書其合裁十二三而已蓋聲音隨俗變移字亦因聲改易且俚俗所稱半皆有聲無字之字唐宋後小學之書率以委巷所製僞字當之竊取諧聲之義益以偏旁孳乳寢多伊于胡底乎因據平日習聞家鄉方音以類分隸各原其聲轉之由欲俾流俗承訛悉衷古昔復爲吳語詮若干卷穀梁子曰望遠者察其貌不察其形聽遠音者聞其疾不聞其舒倘審辨未精易滋傳會故所釋無過百里以內街談巷說所恆及者拘墟之謂不能免也仍命曰吳語以嘉定地雖僻陋亦古句吳之一隅也曩者陳進士令華州里通家過從少密隨舉方音互求證釋往往以苦思得之出相告語輒點頭稱快

矜以爲創獲進士學識宏遠更能晰余疑義啟余不逮座有他客無弗哂爲迂者蓋信古之癖惟吾兩人實有同志然其時僅據意想所及未嘗博攷載籍亦無暇筆之簡札遺忘已多今進士久爲異物余以獨學寡聞乃得撰成專書末由質正亡者又未嘗不廢書而嘆也將來君子縱觀及此熟察聲音之通轉鑒余搜索之勤劬其不與釋常談等書比類而齊觀焉則未死之令華而後世之子雲也

至聖世系表一卷公自序

錢氏世系表一卷公自序

四史朔閏攷補一卷 群經古音鈎沈四卷

擬太倉州志人物傳例一卷

續隸續三卷 金石錄四十冊

樂斯堂文集六卷

小泉來山館詩集八卷詞二卷

唐文集錦十卷

客杭日記二卷

公自識曰元郭氏天錫著客杭日記一卷近長塘鮑氏刻知不足齋叢書中所記時事居多餘皆畧焉庚申之歲予負笈武林游蹟所記勝概不少且杭為天下大都會地方耆宿及才人名士來往者日不暇給予課誦之暇時或接聞緒論隨日錄之風雨陰晴亦所兼紀因取

郭書之名用標卷首若云希蹤前哲吾豈敢也

日記四卷

丁丑丙寅年

多識與名士講學之言及攷證所見金石拓本經籍書畫

讀書日流十卷

樂斯堂印存三卷

集古印存八卷

集漢魏古印於官名地名每加辨證

右顯考趙堂府君著 公諱侗字同人號趙堂廩生恭

應 召試列二等嘉慶庚午順天舉人 文穎館校錄

書成授知縣加三級卒年三十有八 後學吳鍾茂題諱

大田印存八卷

右族兄大田公著

公諱克芸字大田布衣卒年

子世求字秉田精篆刻能世其業亦有印譜卒年

昂青吟稿四卷

右族兄晴川公著 公諱錫奎字桂宮號晴川監生

封修職郎卒年六十六 公愛才如命至老不倦弟諱錫圭公諸生子諱汝青監生入資

為府知事俱早卒聞皆能詩稿本余未見

鄭鄉詩文集十四卷 从子慶曾曰公力學篤行謹于納交同好多知名士事父母至孝合于幾

諫曲從之訓教生徒有法不獨較短長于字句間必誘之至于道道光元年 詔舉孝廉方正之士邑之大夫以公名呈于庠力辭不果應此可見公之得于輿論者遠邇無異詞焉

右堂兄竹孫公著 公諱師康字鄭鄉號竹孫嘉慶癸

酉拔貢生官安徽祁門縣教諭卒年三十有四

漢玉剛卯攷一卷瞿君樹本陳君瑒周君衡俱有題跋

五代史記補註

金石文字管見錄二卷

右從兄靜孺公著 公諱師徵字鑑人號靜孺監生卒

年三十有五

補錄許庭詩鈔二卷詞二卷賦二卷

說文繫傳刊悞二卷

右堂兄許庭公著 公諱師慎字許庭監生卒年三十

有二 子慶曾曰府君為曾大父家孫曾大父年逾六旬初得抱孫含飴之樂見于顏色又喜同生于戊申

因取康成故事以為小名隱然有傳經之意也姿稟明慧作文援筆立就不假思索小試不利援例入成均後棄舉子業入幕府薄游浙西疾作而返戊寅遭先大父之變府君哀不自勝謂向以蔭下而得安閒今率遇此後將奈何耶府君之疾遂日篤明年九月竟不起矣

先德述聞

嘉定錢師璟直卿謹識

今夏編次先世藝文志畧既竟其有著述不傳而流
風餘韻爲人稱道者謹錄如左曰述聞者述所聞于
世父亦軒府君仲父小廬先生也

始祖考鳳里府君諱鎡從虞山鳳里遷嘉定之盛涇卒年
不可考

陳人公曰始祖自烏目山徙居嘉定抱犢巖耕雅尚隱
節里中有不平事輒用直言反覆勸解事釋乃已時以
馬少游目之

二世祖考北郊府君諱浦字北郊卒年八十有三

陳人公曰高祖承父業服先疇積德累行篤生二子曰勤課之欲其成名今兩支子姓皆潛心誦習成祖志也
三世伯祖頤郊公諱炤字士明卒年六十有五

介邱公曰公稟性剛毅有氣節不爲勢力所搖雖居市廛未嘗與俗伍亦不少假于人其耿介類如此

三世祖考順郊府君諱炳字順郊卒年七十有九

小山公曰高祖生平孝友敦篤天道賞善報以饒足

四世伯祖純甫公諱瑜鄉飲賓吳氏偉業有七十壽序卒年八十有二縣志有傳 贈修職郎

聞氏在上曰君吳越武肅王裔少居貧廢書習貿遷化居之業未數年累致千金性仁厚不以財自殖遇里黨

中有緩急力應之恐後教子弟方嚴有儒者家法胸有經濟凡邑中農田水利興革諸大事邑大夫每虛懷諮訪舉鄉飲賓力辭不赴子嶙歲貢生

四世伯祖守郊公諱珍卒年六十有九來孫塘有練祁先塋表

陳人公曰伯祖好居積家業日厚又好讀書延名師訓子尤屬意于孫今惟亮兄早歲食餼所謂有志者事竟成也

四世祖考侍郊府君諱珠卒年四十有二

陳人公曰我祖爲人振振誠懇家雖饒裕沖然退遜性好麴蘖飲必盡興惜年強仕無祿而殞祖母罹厄願以

身殉還念遺孤撫育誰任因甘守志松筠節勁未得衰
旌至今猶恨

五世伯祖介如公諱崙諸生卒年八十有一

陳人公曰公倜儻明允令聞旁達高談能驚四座雖禰
伯父而于本生母問寢視膳無間寒暑事兄尤厚孝而
兼友可謂篤于所生矣

五世伯祖子藏公諱密卒年二十有五

陳人公曰公剛方嚴厲星眸虬髯善談王伯大畧見者
輒刮目待之力能扛鼎其事母尤以孝聞

五世祖考公瞻府君諱岐卒年六十二 例贈中憲大夫

陳人公曰吾父幼孤家業不支生平最愛花木于宅後

營一小圃翠竹千竿名花不絕圃東有池蒔蓮蓄魚皆
賞心樂事也

高伯祖平淵公諱濤卒年八十有九

陳人公曰堂兄幼孤及長廢書習賈延師訓子學業日
進顧而樂之其營葬兩世也竭力成禮生平謹守和藹
有喜色無怒容卽有橫逆之來怡然順受置不與校故
不獨親族鄉里以恩相受卽臧獲奴婢無不撫之以恩
於戲古有邊菩薩之稱跡公言行亦可稱菩薩矣

高伯祖子登公諱瀛號鶴洲貢生候選訓導卒年四十

贈文林郎河南淇縣知縣

林氏令旭曰錢氏自鄉飲公宏啟詩書之緒至司訓式

廣前猷丈夫子四人皆卓犖不羣而公爲冢嗣天性孝友力學敦品自諸生入貢大廷需次縣學博士先後從遊孫松坪周晉裴王瞻彤諸君之門文則體兼今古詩則原本風騷罔不涉其堂而徹其奧也公爲人資性卓越而執德淳厚嘗以厥宗鶴灘先生自期因號鶴洲與人交謙恭和藹克有終始生平拯急濟困之舉尤更僕未易終嗚呼學如是德如是亦可謂君子其人矣

高伯祖淳文公諱灝諸生卒年三十有一

陳人公曰胞兄幼宿慧善讀書其詩古文詞社中推爲祭酒又多智畧有肝膽時邑令聞公有疑事必決于公嘗于里中立石爲放生河請于當事禁止捕魚

高伯祖惟亮公諱澄廩膳生卒年二十有四

慨亭公曰曾祖考稟異姿年未弱冠卽補學縣生食餼于庠好讀書以大器自命顧厭故宅近市屏迹西岡下帷力學丙夜不輟未幾致疾質志而歿

高伯祖渭宗公諱沂卒年七十有一

陳人公曰兄秉性剛直不爲利疚不爲威屈爲子藏公後真是父是子也

高叔祖子周公諱溥諸生卒年四十有八

陳人公曰弟少游庠英氣勃發鑽研經史諸子百家每有疑義日坐奇賞齋構思夜分不輟誠善讀書者也又好藏古書蓄筆古所謂書淫者子周足當之

高叔伯南一公諱淮卒年七十有六

陳人公曰弟性耿介自守高氣傲物家雖貧不肯作乞
憐態其于音樂尤淡獨絕

高叔祖子韓公諱瀚號竹樵貢生侯選儒學訓導卒年五
十有七

陳人公曰弟讀書之暇喜益玩又好客有平原十日之
風始厄于喪明再厄于回祿終遭盜賊席卷家業日索
鬱鬱而歿

曾伯祖天石公諱機字伊在卒年八十有二

陳人公曰天石以瘍科爲業不得志遷蘇州吉利橋生
平能歌詩彈琴又喜熊伸烏經爲修煉之術

曾伯祖台建公諱標附監生卒年六十有一

陳人公曰台建忠厚誠樸言行相顧有酒癖每飲必醉
如玉山之將頽觀其楹帖云愛我無如醉輸人不但碁
情見乎詞矣

曾伯祖讓木公諱栴監生卒年六十有五

陳人公曰讓木爲人和藹不露圭角性嗜茶收藏佳磁
茶具甚富尤愛盆蘭中庭臚列啜茗焚香其樂事也

曾伯祖上林公諱梓卒年七十有五

陳人公曰上林吾宗一異人也最靈巧其製火砲極精
後居吳塘西莊有竹有池力田自給凡家用之器皆手
製工巧絕倫又視死如歸其末也延僧預建佛事每間

七日則道裝乘軒陪僧眾各廂行香禮佛屬親友皆白衣隨之昔陶彭澤自爲祭文其間風而起者乎

曾伯祖天培公諱如升諸生卒年二十有八

續外岡志有傳

陳人公曰天培穎悟不凡詩古文詞多警句善畫山水與張古民陸桐源輩爲畫友與張擔伯朱以載輩爲詩友太倉唐東江本邑張樸村王未岩諸先生咸嘉賞焉

曾伯祖元禮公諱楷監生卒年八十有五

續外岡志有傳

敬亭公曰本生父爲人端慤有長者風邑令咸禮重之每有公事輒委爲祭酒性儉約衣不重帛年踰七十精力如壯時親督孫輩應試丙夜卽衝冒霜露不辭其勞苦也

曾伯祖吉臣公諱枚諸生卒年三十有三

陳人公曰吉臣幼孤力學早歲游庠試輒高等善歌詩精書法又多謀畧里中有賦役大事咸來質證染瘵疾而卒惜哉

曾伯祖衡臣公諱梅諸生卒年四十 贈文林郎

陳人公曰衡臣好讀書旁通星卜更精元門導引之術曾叔祖爲章公諱樸監生卒年四十有六

陳人公曰爲章喜豪飲愛花卉家多藏金石文古琴客至則臚列賞玩高雅不俗著有墨影齋印譜

師璟案印譜今不傳

曾叔祖暘若公諱樾卒年四十

陳人公曰暘若文理頗優自謂取功名如拾芥恃才傲

物有目空一世之概學問便無進境博一衿而不得賚志以歿傳之爲子孫不虛心者戒

曾叔祖叔高公諱金榜字西亭卒年七十有五

咸齋公曰公苦志讀書試輒不利因弃就武卽得入泮尤擅篆刻生平酷愛花卉植菊百餘種時與弟兄叔姪酌賞其興致稱雅善焉

曾叔祖方令公諱棻卒年七十有三

可廬公曰公以醫爲業家雖貧必踐然諾爲人剛介正直乾隆庚辰咸齋堯光兩兄善成先志欲建宗祠方謀卜地公乃慨然立券以祖遺制號北七畝地二畝創捐爲建祠之基由是宗人各踴躍樂輸不逾年而功竣

嘗有所得免墓祭之煩公之功不可沒也

族伯祖北溟公諱鯤卒年五十有四

陳人公曰北溟能讀父書守先業有膂力善用器械不茹柔不吐剛能文能武禦侮全材也

族伯祖升初公諱旭卒年五十有三

小山公曰升初讀書之暇畱心繪事家多藏名畫摹倣甚工與其弟爻吉一以人物名一以山水名獨好酒常沉醉不以爲困

族伯祖希明公諱暉卒年八十

可廬公曰兄侗儻有才略處事精詳人或誘之必盡心力又不自伐其功其肫摯如此年近大耋神明不衰人

見者以爲地行仙也

堂伯祖彥輝公諱耀監生卒年七十有四 贈文林郎

小山公曰彥輝才情侷儻孝友敦篤出于天性其父衡
臣公有痰疾出言顛倒歲試隨至玉峰不離左右恐其
病作也後父歿事母亦孝喪葬俱盡禮嫂瞿氏苦志守
節爲之具呈題請 旌表弟永輝病篤延醫調治參藥
兼施得以安痊八年造耕道堂又念姪蘊剛無房居住
將宜慶堂分授之因艱于嗣弟煌舉塘纔兩月血抱爲
嗣教以義方延名師訓之故塘得有聲庠序此彥輝之
樂境也又喜作善事辛未秋于鎮南獨力創建迎恩橋
重建盛涇橋名曰保安歲飢則出糶捐賑歲疫則設局

施棺種種善行難以枚舉此特其梗概云

從伯祖彥昭公諱煒卒年二十有五

漑亭公曰伯父少好學時家方落歲率數遷無力聚書

抑鬱不得志遂患狂疾臨歿時猶索書者數四

族伯祖啟東公諱曦堂伯祖實隣公諱方英諸生俱
早卒從伯祖恆升公諱昇卒年五十有八著述皆未
見按王氏輔銘選練音集引孫學士致彌云錢曦字
彙彩邑庠生胸次磊落得春風沂水之意著有四書
要旨周易精義諸書年甫及壯率錄江村雜興絕句
二首錢方英字日臨金山衛庠生錄臥病清涼菴五
律一首縣志藝文考
錢昇著有詩經纂注

族伯父葆光諱成諸生卒年六十有七

敬亭公曰葆光讀書自好精鑒古玩尤工山水弱冠補

縣學生丙戌丁亥間學使新建曹公于歲科試前另攷

書畫葆光與焉繪五松圖以進蘇太兩屬中獨賞鑒之
欲置優等食餼葆光試後卽歸招覆不到人問其故曰
以畫列前益形吾文之拙也其高致如此

堂伯父雲莊公諱城字蘊剛卒年八十有四

小廬先生曰公生有異姿工畫能詩兼及軒岐歷游燕
秦數十年相識皆知名士惜後起無人所作多不傳

族伯父又東公諱學坡卒年三十有七

又沂曰公少讀書廢于家事爲人倜儻有才工分隸極
波桀起伏之妙于漢人近百石卒史邠陽令諸碑惜乎
降年不永未盡所詣後起皆不讀書吉光片羽不克傳
流故知之者鮮也

其有藝文已爲著錄而逸事多可紀者彙書于此惟
我高曾祖考道德言行人所共知且有先我而述之
者則不贅已

陳人公曰介邱公平生正直持盈樂善扶危濟困遠近
感之而于孤寡尤爲憐惜不吝貲財全人名節順治間
奏銷案起通學生員皆欠糧被斥公以急公獲免父母
沒治喪營葬規模宏遠與縉紳大家無異其在官也清
操自持凡修建學宮公署諸事不惜清俸以捐助之課
士憐才清寒必助之甚得士心告歸後營別業于南因
東岡草堂舊址復建堂築亭雜蒔花木回廊曲折奇華
繞砌桂林成列修竹干霄堂成倩王烟客先生仍書舊

額不欲沒其名也每花朝月夕與陸菊隱唐東江朱扶九徐平谷諸先生賦詩飲酒識者謂騷壇復振云

可廬公日子辰公年十四而孤弃書學賈數爲隣里所

侮始折節讀書志聖賢學著述甚夥其詞論皆切理勢獨伸已見卓然能使古人首肯詞句之工拙不屑計也

是時陸清獻公爲邑宰延入署中與之論學書與子辰字說俱載三魚堂文集近代俗士靡靡如生翁者洵能

務實學者矣

潛研堂文集有錢處士行狀族孫塘作傳彭進士紹升儒行述有傳

陳人公曰滄洲吾宗知古者也好讀書晝夜不倦攷訂古今事實婚喪禮儀族中凡吉凶事必諮而後行又識古玩辨字畫眞贋好秦漢圖章

陳人公曰蒼雪幼孤好讀書入太學弱冠隨舅氏王未岩先生入都丁酉順天鄉試卷列首薦同考官繆曰藻以不得掄元固爭見斥由內廷纂修古今圖書集告竣議敘知縣歷任河南上蔡考城羅山淇縣及鹿邑內鄉等六縣各著賢聲人稱神父令淇時值歲歉設法賑濟朝夕親督胥吏不敢侵蝕復以飢民多疫疾搜集奇方全活甚眾其濬城濠修關帝廟城隍廟及文廟學署等大工咸勤慎視事清介自矢旋卒于官

可廬公曰鈍夫兄端方孝友悃悃無華少學嗜學爲文根據經史不事葩藻弱冠後補縣學生壬午鄉試同考官得其文知爲令器力薦不售士論惜之書法顏清臣

作詩宗唐宋精于六書所著載入州志藝文類

可廬公曰敬亭兄績學工文少爲山東劉公其旋拔案首補縣學生試輒高等其事嗣母及本生父母也先意承志無不得其懽心後畱意岐黃未嘗出而問世然技術旣精造門求醫者踵自相接子

紫庭

能傳其業

潛研堂文

集有墓志銘

王氏昶曰錢君旣亭以知縣請就教職選江寧府教授委監鳳池鍾山兩書院四十九年纂修南巡盛典君烟榻無華醞釀經史通注疏集金石精推步明樂律善篆隸與王西莊光祿叔晦之徵君弟獻之州倅爲根柢之學所著搜奇嗜博馳會貫通非俗學所能津逮也

跋

學者讀書易得門徑難訓詁詞章兩家分道揚鑣各造其極非得於父兄師長指授揚子所謂擿埴索塗冥行而已吾粵錢氏世有聞人自陳人先生肇其緒至宮詹而益昌其學綜貫天人鉅析今古卓然成一代大儒阮芸臺相國舉九難之目謂求之百載歸於嘉定不其然歟宮詹之弟可廬徵君從子旣亭教授暨猶子輩後先濟美彬彬馘馘此不止如昔人稱一門之內五業俱修者於虜盛矣哉女夫直卿爲徵君之孫趙堂大令之子少孤露能力學以自成立頃哀其先世詩文著述爲錢氏藝文識畧郵以眎余海內閱是編者繇是以得讀書門徑如川然有源以印浦

而後大不第爲錢氏一家之書也趙堂幼學博覽得宮詹
徵君遺緒早歲已著書滿屋中年殂謝未竟其業卽所成
就已足藏山傳人直卿景先業而泝舊聞孜孜不已學卽
在是矣爰書此勗之葛其仁

其學益貫天人極世今古卓然一於大淵而茫臺跡因
吾知逾尺甘膏聞人自刺人武主筆其辭生宮善而益昌
秋我野然父及祖是誰對冊千夜誰對對東望冥行而日
學善觀書長將門登漢賦詰歸章兩案公歡慰觀各啟其



